

摘藻堂四庫全書薈要

史部

欽定四庫全書會要

史部

世宗憲皇帝聖訓卷三十五

六

詳校官編修臣繆晉



欽定四庫全書蒼要卷七千八百六十七

史部

大清世宗敬天昌運建中表正文武英明寬仁信毅大孝  
至誠憲皇帝聖訓卷三十五

綏藩服

雍正元年癸卯正月丙戌

上召來京叩謁

梓宮之科爾沁達爾漢親王和碩額駙羅卜藏滾布等入

養心殿

諭曰爾等先世俱在

太祖時歸誠効順竭力同心誼若一家懋著勤績爾等皆  
深沐

皇考加恩愛養之人今聞

皇考升遐叩謁

梓宮哀號擗踊朕心深為憫惻仰惟

皇考視爾等如子孫於茲六十餘年恩隆情篤今

龍馭上賓屬大位於朕躬朕仰承

皇考付託之重當視爾等亦如一家深加愛養爾等宜感念

皇考深恩和衷共勵竭誠効力爾等衆扎薩克俱有辦理旗務統轄衆庶之責凡事秉公矢慎各撫恤屬下人等慎勿擾累

三月癸巳禮部議覆福建巡撫黃國材奏琉球國進貢頭號船內貢使表文及方物一半沉海二號船內彝目應准其返國令補具表文方物進呈

上諭曰琉球國進貢使臣毛宏健等所坐頭號船內人員俱衝礁覆沒甚屬可憫所失表文方物免其補進二號船內所存方物交與來使帶回仍准作進貢其賞給之處著察例具奏所賞之物行文該地方官賞給令其起程

四月乙卯

上諭理藩院爾衙門人員來往蒙古地方者間有不肖之徒肆行無禮勒索陵虐夫外藩之與天朝不但扎薩克

王即台吉亦係賓客豈可令領催等卑賤之人肆其欺陵爾衙門嚴行申禁詳定條例嗣後永遠遵行

六月乙卯

上諭理藩院郭爾羅斯乏食爾等議將鄰近扎薩克公巴圖旗下倉糧撥給散賑等語殊未妥協若將此項倉糧撥給將來伊旗下儻遇災旱又將何處米石撥給乎朕思白都納貯存倉糧頗多可備散賑之用但止給與米糧餬口並無產業營生亦非久遠之計從前給產業買

牲饋之事俱將富戶派出以致苟且塞責所給之物浮報數倍蒙古並不得實惠夫科爾沁一旗與別部落蒙古不同

太祖高皇帝時首先臣服且為朕

皇曾祖妣孝莊文皇后

皇祖妣孝惠章皇后之母家世為國戚恪恭異順歷今百有餘年今聞伊屬下之人乏食朕心軫惻著即動用正項錢糧三萬兩往賑再派出大臣一員司官一員往郭



爾羅斯旗下將實在窮苦並無牲餼之人查明數目按其戶口給與乳牛羊隻務令寬裕足用爾衙門會同總理事務王大臣速議具奏

丙子

上諭八旗蒙古都統等塞外居住之八旗察哈爾蒙古護軍之器械三年查看一次而前往之護軍叅領驍騎叅領等騷擾蒙古勒索馬牛等物其三年一往比丁之官員亦有勒索之處朕所洞悉再察哈爾蒙古內未

曾出痘者甚多若來京挑選護軍僅遇出痘恐有損傷嗣後察哈爾八旗護軍缺出即著察哈爾總管副總管叅領公同閱看人材可用者挑補其挑補之護軍俟三年查看軍器時從京中奏派大臣一員前往查看軍器將所挑之護軍一併驗看其三年比丁亦照外省例交與該總管等詳察明白將比過丁數造冊送各該旗都統則衆蒙古無騷擾之患亦無往返京師之事於伊等大有裨益著八旗蒙古都統領侍衛內大臣前鋒統領

護軍統領公同議奏

七月辛卯

上諭禮部朝鮮國歸順我朝以來恪盡藩職進貢年久在  
太宗文皇帝

世祖章皇帝

聖祖仁皇帝時屢次施恩將伊國貢物減免今所貢禮物  
尚多此內若有可減去者爾部會同內務府確議具奏  
再加減免以紓朝鮮民力

是日頒賜朝鮮國王李昫及使臣李穡等

上召使臣李穡進見諭曰爾朝鮮國王啓疆東土於我  
太宗文皇帝時誠心豫附恪守藩封我

太宗文皇帝

世祖章皇帝視同一家恩施優渥爾國王祖父亦能仰承  
厚澤奉職惟謹百年於茲矣我

聖祖仁皇帝化成久道萬國來王念爾國君李焯幼纘嗣  
服克紹前猷權不下移惠能撫衆數十年來職貢匪懈

用是

隆恩異數寵眷有加賚予便蕃貢物頻減病則賜之以珍藥歿則錫之以榮名

特遣近臣優頒奠弔今朕纘承大統爾嗣王李昫遣爾恭進賀表朕嘉爾嗣王忱悃肫篤又念爾係嗣王宗族特行召見以示優禮爾歸告爾嗣王繼乃祖父之緒夙夜匪懈慎守綱維毋替厥服長為屏翰不忘恭順克殫忠誠朕必體

列聖怙冒宏仁俾爾遠藩保安於永久爾其識之

八月己巳管理藩院侍郎事都統拉錫奏喀喇沁等處歲歉乏食請於查覆到日賑濟

上諭曰據奏俟查覆到日加恩拯救現今乏食人等必至失所著戶部作速派官二員領銀五萬兩前往再著侍郎本錫副都統阿林保作速馳驛赴喀喇沁處俟錢糧一到即行散賑扎薩克八處俱一面清查一面給發毋得稽遲

丙子

上詣

景陵奉移

梓宮敬安

地宮率諸王大臣蒙古王台吉塔布囊等行禮舉哀畢  
諭蒙古王等曰自爾先世歸附

太祖

太宗蒙被聖化於茲五六代矣世締國姻思深祿重兄弟

主臣洽比保聚安居樂業百有餘年其間厄魯特噶爾丹猖獗弄兵破喀爾喀七旗侵及內扎薩克蒙古蹂躪游牧之地

皇考為爾等三次自將出師乃滅噶爾丹使爾等永享太平之福六十餘年以來爾等屬下偶有饑饉災傷莫不發帑與糧資給畜牧更派富戶屯田代耕使饑者復安散者復聚

皇考養育爾等蒙古恩澤重矣大矣曩者郭爾羅斯以歲



饑聞朕仰體

皇考聖意即遣大臣前往發倉賑救賞給牛羊今喀喇沁  
翁牛特八旗又以歲饑間復遣大臣前往即速查明饑  
口動用正項錢糧買米散賑夫一時阻饑朕雖賑之常  
年貧乏之民在爾各君長於本旗內裒多益寡互相賙  
恤以養育之庶幾得所耳若仍然厚斂重徭納之於陪  
危之域使之至於散亡孰為爾等納賦孰為爾等供徭  
愛民惠下是第一要務不可不知也連歲災旱頻仍今

年又遭饑饉爾等各子其民者如何減賦如何輕徭如何裕其農功如何孳其畜牧爾等王貝勒大臣等議定務使各得生理以仰副我

皇考聖心以慰朕心定議之後儻有顯背公議仍然重賦苛役者國法具在非朕所得而私也我

皇考目覩爾等長成愛如子孫事事包容處處軫恤爾等視

皇考如祖父恃

皇考之慈愛每事懈逸朕新即位務須各盡爾職謹慎小心管轄屬下訓練兵丁嚴禁盜賊奉公守法循分安生仰報我

皇考軫愛之恩俾朕得以仰法

皇考慈惠爾等至意始終保全永永勿替朕之願也今日特於

皇考梓宮前諭爾等知之

九月丁亥理藩院奏扎魯特等處乏食請加賑卹

上諭曰著再給銀二萬兩交與本錫阿林保齋往此項因從前發去銀五萬兩或有不敷添解備用並非分別此一旗給與若干彼一旗給與若干也可將兩次銀兩合數旗之人通行散給如有不敷再行請旨

雍正二年甲辰正月丁丑

上諭理藩院朕問貝勒博貝管轄之吳梁海人民近時何以資生據奏在將軍祁里德處借餉一萬八千五百六十兩買牲分給各得產業今勝於昔其所借餉銀伊將

俸銀逐年抵補等語朕思博貝歷年宣力勲績卓然且吳梁海等衆均係朕之百姓豈有養育朕之百姓而借餉於朕之理所借銀兩不必扣還著行文將軍祁里德知之

三月壬辰

上敕諭準噶爾台吉策妄阿喇布坦爾前者無故侵擾我哈密疆界罪在不赦

皇考聖意止令於邊地防守雖各路發兵原無勦滅準噶

爾之意也其後澤卜尊丹巴胡土克圖為爾奏懇

皇考欲施恩寬宥所以遣使楚楊託音等諭爾前年爾所遣使垂納木喀布哇等至澤卜尊丹巴胡土克圖處轉至總督年羹堯軍前送至京師朕定爾平生功罪開示大義面諭遣回今爾深省前非歸誠請罪遣使根頓同楚楊託音前來奏辭恭順得遂

皇考初心朕意嘉悅爾奏稱惟祈休養生靈闡揚正教為第一要務等語爾台吉不過準噶爾一部落之主尚欲

休養生靈闡揚正教何況朕為四海臣民之主普天之下皆朕土率土之濱皆朕臣乎用是特遣御前總管京城喇嘛班第副扎薩克大喇嘛達爾漢楚楊託音內閣學士衆佛保副都統扎錫喇嘛錫拉卜格春等宣諭若台吉果欲輯寧爾國尚其誠一乃心與朕所遣大臣等申定疆圻諸事循理妥議歸於和順朕必施恩軫念永加眷顧仍前通市使命往來爾台吉誠能以鮮終為戒其必惟和惟順無貳無疑披瀝悃忱以期永好不特克

協於朕休養生靈至意爾台吉遊牧地方亦永永無虞  
安居樂業矣特此諭示並賜各色緞二十七疋爾其祇  
承

四月戊申

上諭理藩院據蘇尼特阿霸垓阿霸哈納蒙古人等俱稱  
連年災傷今又遭大雪牲餼俱已倒斃等語若差官查  
奏始行加恩則現今乏食之人恐至饑餒著叅領多索  
禮侍衛納蘭馳驛前往查核發戶部帑銀二萬兩會同



阿霸垓公德木楚克逐一查明計算實在無畜牧不能  
度日者將此銀兩酌量散給均使霑恩

五月辛亥

上諭禮部兵部安南國王黎維禔遣陪臣范謙益等賀登  
大寶貢獻方物並三年歲貢從廣西桂林府水路進京  
朕因向來驛遞供應多有騷擾曾諭定例供給之外不  
許溢額應付今安南慶賀大禮遣使遠來應加恩恤其  
經過地方供給食物酌量增加令其充足以示朕嘉惠

遠人至意

十月己亥廣東巡撫年布堯奏暹羅國運米并進  
穀種等項

上諭內閣暹羅國王不憚險遠進獻稻種果樹等物最為  
恭順殊屬可嘉應加獎賚其運來米石令地方官照粵  
省現在時價速行發賣不許行戶任意低昂如賤買貴  
賣甚非朕體恤小國之意嗣後且令暫停俟有需米之  
處候旨遵行其壓船隨帶貨物一概免徵稅銀來船捐

目徐寬等九十六名雖係廣東福建江西等省民人然住居該國歷經數代各有親屬實難勒令遷歸著照所請免令回籍仍在該國居住以示寬大之典

十一月己酉

上諭怡親王允祥外藩人等來朝給以食物及其歸國頒以賞賜俱有定制但該管官員未免忽畧遂使遠人不能實惠朝鮮國守職恪順百年有餘今琉球來使亦甚恭謹伊等歸國時一切應賞之物擇其佳者給與務使

得需實惠嗣後除理藩院蒙古賓客外朝鮮鄂羅斯暹羅安南等國遣使來朝所給食物歸時所頒賞賜爾會同該部辦理或有應行加賞之處酌量定議奏聞

雍正三年乙巳四月己丑

上諭雲貴總督高其倬覽奏交趾舊界有遠近互異等情朕思柔遠之道分疆與睦鄰論則睦鄰為美畏威與懷德較則懷德為上據云都龍南丹等處在明季已為安南所有是侵占非始於我朝也安南自我朝以來累世

恭順深屬可嘉方當獎勵是務寧與爭尺寸之地况係  
明季久失之區乎其地果有利耶則天朝豈宜與小邦  
爭利如無利耶則又何必與之爭朕居心惟以大公至  
正為期視中外皆赤子且兩地接壤連境最易生釁尤  
須善處以綏懷之非徒安彼民正所以安吾民耳即以  
小溪為界庸何傷貪利倖功之舉皆不可為訓悉朕此  
意斟酌行之尋安南國王黎維禔奏稱臣國渭川州向  
與雲南開化府接壤以賭咒河為界河之西歸開

化府河之東歸渭川州聚龍社忽接雲貴總督移  
咨臣國聚龍斜路村等六寨皆係開化屬內地向  
為都龍土目占侵至今四十餘年合行清立疆界  
臣已具文回覆隨有開化總鎮親來斜路村之鞍  
馬山去賭咒河一百二十里就立界牌設立房屋  
分兵防守臣備錄情由謹具奏聞

上敕諭安南國王此事王未奏之先雲貴總督高其倬方  
差員勘界之時即已摺奏矣朕念安南累世恭順王能

恪繼職守可嘉且此地乃棄自明朝安南之民住居既  
久安土重遷恐有流離之苦朕心存柔遠中外一視甚  
為不忍已批諭將斜路村等處人員撤回別議立界之  
地務期允當諒茲時所批已到必另有料理矣王但自  
共厥職以綏爾民靜候可也

十月癸酉

上敕諭西洋教化王伯納弟哆覽王秦並進貢方物具見  
悃誠我

聖祖仁皇帝恬冒萬方無遠弗屆

龍馭升遐中外臣民悲思永慕朕纘承大統勉思紹述  
前徽教化王地處極遠特遣使臣齋章陳奏感

先帝之垂恩祝朕躬之行慶周詳懇至詞意虔恭披閱之  
餘朕心嘉慰使臣遠來朕已加禮優待至於西洋寓居  
中國之人朕以萬物一體為懷時時教以謹飭安靜果  
能慎守法度行止無愆朕自推愛撫恤茲因使臣歸國  
特頒斯敕並賜糴緞錦緞大緞六十疋次緞四十疋王



其領受悉朕惓惓之意

雍正四年丙午十月丁卯浙閩總督高其倬奏蘇  
祿國王遣使表貢方物

上諭內閣蘇祿國遠在海外隔越重洋從來未通職貢今  
輸誠嚮化甚屬可嘉閩省起送來京之時著沿途地方  
官護送照看應用夫馬食物著從厚支給以示朕加惠  
遠人之至意

丙戌禮部奏琉球國中山王尚敬為謝

恩遣使臣進表并貢方物應照例察收

上諭曰琉球國王因朕頒賜御書匾額及玉器綵緞等物特遣使臣進表謝恩貢獻禮儀具見誠悃朕加恩遠藩不欲收其貢物但既航海遠來不忍令其帶回本國著交內務府存留准作二年一次正貢以示朕體恤遠人之至意

十二月丙戌

上諭理藩院向來四十八旗王台吉派為兩班來往京城

伊等即有本地要務或身抱疾疴亦必前來交春始回  
明歲冬季又復該班日期既近冬寒往返勞苦深可軫  
念伊等內有願請朕安者當於草青時照常前來其年  
例應分為三班二年一次俾伊等得以休息爾等議奏  
雍正五年丁未十一月丁巳

上諭理藩院今年口外蒙古地方收穫甚豐科爾沁敖漢  
等十六處扎薩克地方未能豐收宜加特恩科爾沁地  
方五旗著賞銀三千兩交與現今在京科爾沁王羅卜

藏滾布貝子拉錫等帶去查明賞給教漢等十一處扎薩克地方著賞銀六千兩爾衙門派司官二員分兩路帶去會同各處扎薩克查明賞給再此等扎薩克各旗倉內現有存貯米糧其未能豐收者應如何酌量借給之處爾衙門議奏

雍正六年戊申正月己卯

上敕諭安南國王朕前令守土各官清立疆界原屬行之於內地未令清查及於安南也督臣高其倬以職任封

疆詳考誌書兼訪輿論知開化府與安南分界之處當在逢春里之賭咒河於是一面設立防汛一面奏聞比因該國王陳奏朕特降諭旨令該督另議立界又恐高其倬固執已見復命接任總督鄂爾泰秉公辦理鄂爾泰體朕懷遠之心定界於鉛廠山下小河一面設立防汛一面奏聞較之舊界已縮減八十里誠為仁至義盡此皆地方大臣經理邊疆職分所當為者也朕統馭寰區凡屬臣服之邦皆隸版籍安南既列藩封尺地莫非

吾土何必較論此區區四十里之壤若該國王以至情懇求朕亦何難開恩賜與祇以該督臣兩次定界之時該國王激切奏請過於舛望種種陳訴甚為不恭該國王既失事上之道朕亦無從施惠下之恩此天地之常經上下之定體乃王之自取非朕初心也頃鄂爾泰將該國王上年十二月內本章呈奏知該國王深感朝廷怙冒之仁自悔從前執迷之誤踴躍拜命詞意虔恭朕覽閱之餘甚為嘉悅在王既知盡禮在朕便可加恩况

此四十里之地在雲南為朕之內地在安南仍為朕之外藩一毫無所分別著將此地仍賞賜該國王世守之並遣大臣等前至該國宣諭朕衷朕念已加惠藩王亦當俯從民便儻此地居住民人有情願遷入內地者已令督臣鄂爾泰酌量料理並諭該國王知之

二月甲申

上諭禮部朝鮮年貢之例每年貢米百石朕念該國路途遙遠運送匪易著減去稻米三十石江米三十石每年

止貢江米四十石足供祭祀之用永著為例

雍正七年己酉正月丙午

上諭蒙古王等朕思從前所定外藩扎薩克蒙古王等之俸祿比於內地王等較少者必非以內外之故遂有多寡之分也或因爾蒙古王等人員衆多且在外藩居住費用尚為儉約而國家錢糧亦或不敷之處故將爾等俸祿從少定議耳今朕恭承

上天垂佑



聖祖仁皇帝貽庥天下太平無事數年以來屢登豐稔國家錢糧頗為饒裕朕為統馭天下萬物之主凡事當周詳籌畫而行爾蒙古王等以下扎薩克一等台吉以上之俸令著概行加增一倍賞給再平常一等台吉從前俱無俸祿今亦著照扎薩克一等台吉等所食百金之俸賞給此乃朕特行加恩爾等之處朕亦未敢遽為定例總以國家錢糧之出入數與不敷為定耳嗣後著戶部理藩院於每年歲底將仍給與原俸或加賞之處會

同具奏請旨朕於臨時的酌降諭旨

七月己巳

上諭禮部暹羅國王遣使遠來貢獻方物具見悃誠朕念該國遠隔海洋所進方物齎送不易欲酌量裁減以示恩恤遠藩之意但此次貢物既已齎送前來難以帶回本國著照往例收納其常貢土物內有束香安息香袈裟布疋等在內府無須應用嗣後將此等免其入貢永著為例該部詳悉行文該國王知之

八月丁未福建巡撫劉世明奏呂宋夷船被風飄入閩廣地方

上諭內閣呂宋被風夷船既已開往廣東佛山著廣東督撫查照給與口糧加意撫恤聽其候風回國嗣後凡有外國船隻遭風飄入內地者俱著該地方官查明緣由悉心照料動支公項給與口糧修補船隻俾得安全回其本國以副朕恩恤遠人之至意

九月甲午雲貴廣西總督鄂爾泰奏附近雲南之

南掌國王島孫貢象二隻

上諭內閣南掌國遠在西南徼外從來未通職貢今輸誠  
向化甚屬可嘉滇省起送來京之時著沿途地方官護  
送照看應用夫馬食物著從厚支給以示朕加惠遠人  
之至意

十月辛亥琉球國中山王尚敬遣陪臣毛鴻基等  
表謝敕書蟒緞玉器

恩並貢方物

上諭禮部琉球地處重洋之外奉表修貢遠涉風濤朕心深為軫念是以從前降旨令將雍正四年該國王謝恩所貢儀物准作雍正六年正貢以示恩眷今該國王以六年正貢之期仍遵定制遣使航海遠來奉表進貢情詞懇切具見悃忱著將六年進貢之物准作八年正貢若八年貢物已經遣使起程即准作十年正貢著行文該國王知之

已未

上諭禮部朝鮮國王世篤恭順虔修職貢昔蒙  
世祖章皇帝軫念藩封特頒

敕諭所有應進

聖壽冬至元旦表儀俱准於元旦併貢以彰柔遠之至意  
近見該國王於領受賞賚等事皆特遣使臣齎表奏謝  
朕念該國距京三千餘里貢使往來未免勞費嗣後凡  
屬謝恩本章俱著與三大節表一同齎奏不必特遣使  
臣永著為例該部即行文該國王知之

十一月丙申

上諭理藩院八旗遊牧地方甚屬緊要近來總管等仍有貪婪勒索屬下之事蒙古等雖欲陳訴情由因無巡察之人即有含冤受抑者亦無處控告著於每年或部屬司官或監察御史派出一員令其巡察如有此等之事即著據實叅奏儻徇庇隱匿被接任之員查出將巡察官一併從重治罪其歸化城亦照此派往

庚子議政王大臣等議覆署廣東巡撫傅泰奏遲

羅國進貢方物並請採買京弓銅線應否採買賞給之處請

旨遵行

上諭曰暹羅國遠隔重洋輸誠嚮化恭順修職歷有年所其所請採買物件著行令該撫採買賞給以示朕嘉惠遠人之意

雍正九年辛亥二月乙巳

上諭貝勒頗羅鼐朕為統一天下之主凡四海生靈一視



同仁無分中外乃者附近帕爾城之布魯克巴地方人等起釁搆兵互相讎殺朕聞之深為不忍軫念於懷爾能仰體朕意遣使與班禪額爾得尼之使一同前往和說又遣使宣諭朕之恩德布魯克巴地方人等遂感悟息爭輸誠嚮化各帶部落敬順無違且請朕施恩訓誨朕甚嘉悅布魯克巴地方人等自茲以往宜各守疆界共相和睦永遵佛教祇奉恩綸如能黽勉力行朕自益加優眷布魯克巴之諾顏林親齊雷喇布集後身喇嘛

渣色禮布魯克古迹等著加恩賞賜噶碧東羅布喇嘛  
率衆先歸尤為可嘉著從優賞給以示朕懷遠嘉順之  
至意爾可將此諭旨宣諭布魯克巴地方人等知之

七月庚辰

上諭青海王貝勒貝子公台吉等爾等俱係顧實汗之子  
孫自祖宗以來依附內地邊疆恪順供職我

聖祖仁皇帝視爾等如子孫撫育六十餘年寵遇之隆至  
優極渥且念爾等尊崇黃教是以我朝於達賴喇嘛班

禪額爾得尼備極思眷若準噶爾者暗遣賊兵侵犯西地殺害喇嘛毀滅供器實為黃教之罪人爾等僮違棄先人崇祀之教辜負國家歷沛之恩一家之內興起兵戎以啓賊人僥倖之端雖愚昧之人亦不出此前者羅卜藏丹津聽信流言敢行背叛我朝發兵征勦逃竄在準噶爾處困苦辱恥爾等無不聞知今爾等若到彼處路途如許遙遠馬畜必致疲斃彼豈能為爾等置立產業分與游牧地方令爾等各統所屬依然保聚乎況準

噶爾四面皆成讎敵終歲爭戰不休凡用兵之處必置爾等於前虐使任意豈若各守祖父基業永享太平之為得乎爾等若不熟計利害聽伊誑誘之詞依附賊人妄思蠢動將來興師問罪必先及爾等彼時即欲悔禍國法不爾貸也朕所以頻降諭旨反覆開導令爾等會集兵丁小心防守將屬下人早行移入者實冀保全爾等非欲調遣爾等為進剿之用也爾等當思朕愛護安全之至意詳細曉諭屬下人等合力防範果能遵旨奉

行朕自大沛恩膏爾等遊牧妻子既無吞併之憂而中外安居亦永享無窮之福矣

九月戊辰

上諭理藩院邊疆地方報稱鄂羅斯之郎喀前來鄂羅斯近來甚屬恭順伊等貨物至楚庫拜星處即行申報而邊疆地方遲延致使伊等久候時值隆冬其盤費馬畜未免困苦朕特施恩著理藩院派官一員於戶部庫內領銀一萬兩前往賞給以為途中買換馬畜之資

庚午

上諭四十九旗扎薩克蒙古等爾等於

太宗皇帝時即敬順歸降創業之際輔佐効力至於朕身受恩四世爾等感戴之忱朕所確知爾等之騎射技藝亦倍勝於準噶爾但恐爾等之意以喀爾喀遠居絕塞準噶爾即有劫掠亦不過及於喀爾喀爾等可置於度外不知喀爾喀之王台吉俱係爾等成吉思汗之苗裔一姓之兄弟也準噶爾者自元朝背叛至今世為爾等

讎敵喀爾喀乃衆扎薩克之屏障可置於度外乎從前  
皇考親自領兵在圖拉昭莫多地方滅噶爾丹保全喀爾  
喀者亦為爾衆蒙古也其後策妄阿喇布坦之兵來侵  
哈密被我兵擊敗來擾吐魯番被我兵勦殺又暗使策  
零敦多卜等襲破西藏

皇考為爾衆蒙古奉佛之地遣將興師破賊定藏今朕於  
兩路駐劄大兵亦為爾內外之蒙古也嗣後王台吉與  
弁兵等果能出羣効力朕自從優議敘并賜與世襲巴

圖魯達爾漢之號使令名垂於永遠準噶爾事定之後  
干戈永息長享太平之樂矣勉之勉之

十月戊午

上諭大學士等八旗察哈爾俱累世効力之舊人從前征  
討南方勦滅噶爾丹並隨圍出獵以及數年用兵於準  
噶爾宣力之處不可枚舉此次達什率領察哈爾兵一  
千名較衆先到軍營又擊敗準噶爾賊人策零敦多卜  
等奪回駝馬等物甚屬可嘉昨厄魯特大臣來京奏稱



舊察哈爾人等之生計反不如新厄魯特等語朕聞之  
惻憫今沿邊居住之蒙古並王大臣等馬羣之蒙古多  
有伊主不能養贍者似此生計艱難朕心不忍爰命大  
臣前往查勘令伊等各得養贍將朕此旨通行傳諭

十一月丙寅

上諭喀爾喀汗王貝勒貝子公扎薩克台吉並各屬下人  
等近日準噶爾賊夷噶爾丹策零寄信與王喇嘛扎卜  
稱喀爾喀厄魯特法教相同本屬和好及噶爾丹博碩

克圖時失睦既而我父追念前好曾屢奏

皇帝乞將喀爾喀青海復舊安置今

皇帝欲將我如喀爾喀青海入於旗下佐領之內給與封  
號以故我等興兵至此若能成事則將喀爾喀青海照  
舊安置即不能成事亦不令統屬於人等語此實係賊  
夷姦詐離間之詭計從前爾喀爾喀人等被噶爾丹戰  
敗以致失地我

聖祖皇考憫念爾等歸誠存恤愛養將喀爾喀諾顏等按

伊原品封為汗王貝勒貝子公扎薩克屬下人等俱各  
賜生業安享富饒令歸原遊牧處爾等之感恩報德同  
心効力乃人所共悉者準噶爾賊夷出狂悖之言借安  
置爾等為詞欲肆行擾亂即論爾等之封號親王郡王  
貝勒貝子等爵位俱係我朝冊封宗室子孫兄弟之號  
其餘臣下雖効力立功並無封貝子之例惟四十九旗  
扎薩克成吉思汗之後博爾濟錦氏台吉等誠心歸順  
我

太宗皇祖俱賜以宗室封號視如骨肉結為姻親累世寵榮何嘗視為奴僕乎至編設旗分佐領亦欲其易於查考以便加恩並恐扎薩克等互起爭端之故今已及百年何嘗役使爾等一人乎自分旗以來爾喀爾喀之鄂托克達魯哈等屬便於查管遇饑饉則賑濟之行圍出兵則厚賞之可有催徵之事乎此亦爾等所共知者準噶爾賊夷姦詐狡獪外托黃教而擾亂藏地違背教原口雖稱為青海喀爾喀兩家而又搶掠爾等將胡土克

圖俱欲搶奪姦惡極矣且準噶爾一姓自鄂爾栢克尼古勒蘇克齊汗之後興兵擾亂諸部落殘殺博爾濟錦氏幾至斷絕至今讎怨未已今策零敦多卜前來被爾喀爾喀等勦殺敗遁賊夷懷恨必深思欲報復乘隙擾亂若賊夷之事不定則爾喀爾喀不得安衆蒙古亦不得安朕是以不惜國帑發數萬大兵遠行征勦綏靖邊圉祇為爾等生全之計也爾屬下人等宜仰體朕心各加奮勉藉朕威力效法此次進兵之王貝勒貝子公台

吉等朕必為爾等勦滅賊夷永保安寧前者噶爾丹作亂時爾等互為搶掠盜竊今又有搶掠盜竊者此種惡習甚屬愚賤其務力為悛改且爾等既屬內地多年共知法度若舍棄遊牧擅行掠竊干犯王章何不力戰賊夷立功雪恥乎即爾等歸順賊夷亦斷不能保全爾等令爾等安享也爾等宜熟計之

雍正十年壬子三月己卯

上敕諭喇達克汗德中納木扎爾朕統御寰區內外視為

一體凡撫恤遠人獎勵恭順懲治悖逆皆朕分內事也  
爾德中納木扎爾遣使向辦理藏務大臣等呈稱臣惟  
以辦理國事尊崇佛教量力行走採取葉爾啟木準噶  
爾處信息報知貝勒頗羅鼐轉行奏達乞早降恩諭等  
語朕覽之甚為嘉悅從前因爾父尼瑪納木扎爾與貝  
子康濟鼐同心報効朕已沛恩膏今爾亦效法爾父與  
貝勒頗羅鼐一體効力甚屬勤勞嗣後益加黽勉以紹  
前徽則永享朕恩於無既矣茲特頒恩賜賞給緞疋等

物爾其祇領特諭

八月庚午辦理藏務侍郎僧格等奏巴爾布國雅木布葉楞庫庫穆三汗奉表進貢方物

上敕諭巴爾布國雅木布葉楞庫庫穆三汗據爾等奏稱從前不知內地禮儀未遂觀光之志今遣使朝覲恭請訓諭進貢之物不多畧盡恭敬之忱等語朕為天下主一視同仁爾等汗越在邊遠自古未通華夏慕朕仁化萬里輸誠朕甚嘉悅所進方物悉已收納第念道路遙



遠往返艱難爾使臣即由西藏遣回爾等汗但與西藏  
貝勒頗羅鼐協力和衷維持黃教以副朕普育羣生之  
至意特賜緞疋玻璃磁器各種一併發往

十月辛酉理藩院奏杜爾伯特固山貝子班珠爾  
等三旗地畝歉收請賞給米石並借給買米銀兩

上諭曰若俟行文扎薩克等行查未免遲延其扎魯特兩  
處地方著派出侍衛達哈蘇並戶部司官一員帶銀一  
萬兩到彼將家口數目查明賞賑杜爾伯特與黑龍江

相近著速行文將軍卓爾海會同該處御史將杜爾伯特蒙古人等家口數目查明或動用倉穀或動用庫銀酌量賞給

雍正十一年癸丑七月庚辰

上諭辦理軍機大臣等據侍衛達哈蘇奏稱科爾沁公喇嘛扎卜旗分並無牲畜其貧苦人等止有六月至八月米糧今年種穀無多又經亢旱無收等語朕思此所種之穀即使全收亦不足養贍數千人口恐至饑饉流散

不可不預為籌畫伊等與何處相近即動支彼處米穀賑濟及如何養贍俾得過冬之處爾等查議具奏

八月丁丑

上諭理藩院喀喇沁王伊達木扎卜等旗分田穀歉收著派侍衛司官各一員前往查勘實在貧人按名賑給再貝勒僧滾扎卜等旗分地畝雖稱五六分以上收成不  
等或其中亦有乏食不能餬口者著一併查出酌量賞  
給

雍正十二年甲寅十一月庚子

上諭辦理軍機大臣等據哈密貝子額敏奏稱所屬回民等有可種四百石穀之地現在軍營屯田界內願將此作為官地等語哈密地方悉皆朕土無俟伊等獻納且大兵既撤之後此地皆可畱與哈密亦斷無因其獻地另行安置民人之理但此地現與官地交錯若不允其所請照舊令回民耕種難免互相爭角儻收為官地又係回民生計所資朕意或另賞伊等地畝及牛具籽種

或每歲將應得穀石折給銀兩之處著署大將軍查郎阿等就近查議

雍正十三年乙卯六月壬辰福建提督王郡奏呂宋國以麥收歉薄今附洋船載穀二千石銀二千兩海參七百斤來廈賣銀糴麥查五穀不許出洋律有明禁令呂宋以穀易麥請

旨欽定

上諭內閣朕統御寰區內外皆為一體呂宋雖隔重洋朕

心並無歧視國家之所以嚴禁五穀不許出洋者乃杜  
姦商匪類私販私載暗生事端之弊若該國偶然缺少  
米糧以實情奏聞於朕朕尚酌量豐餘以濟之今呂宋  
以麥收歉薄載穀易麥更為情理之當從者著該督撫  
等轉飭有司按照穀麥時價均平糶糴不許內地之人  
抑勒欺詐俾番船載麥回國以濟其用並將朕旨傳諭  
來商知之



大清世宗敬天昌運建中表正文武英明寬仁信毅大孝  
至誠憲皇帝聖訓卷三十五



欽定四庫全書薈要卷七千八百六十八

史部

大清世宗敬天昌運建中表正文武英明寬仁信毅大孝  
至誠憲皇帝聖訓卷三十六

弭盜

雍正元年癸卯八月己未

上諭兩江總督查弼納等太湖三萬六千頃連跨數郡地  
勢既廣支流復多為盜賊出沒之所平時既易藏姦巡  
捕恐難盡力爾等均有統轄之責可公同確議遴選賢

員清查嚴緝務俾匪類就擒餘黨解散地方長享寧靜之福以副朕禁盜安民之意

十月己未

上諭江西巡撫裴率度據奏擒獲寧州銅鼓營姦匪其黨與請嚴加搜捕此等匪類固不容姑息亦不宜急迫若涉因循恐漸致滋蔓若不辨姦良又恐驚衆激成事端但須整理營伍修飭政治官吏廉明百姓畏威懷德此一二匪類何難消弭全在封疆大吏相機而行實心任

事也

十二月庚申

上諭九卿等朕惟靖盜所以安民而欲靖盜必須嚴諱盜之處分併正竊盜之刑法州縣有司因畏盜案叅處往往諱盜不報或以強為竊或以多為少或賄囑事主通同隱匿以致盜賊肆無忌憚定例諱盜處分不為不嚴無如督撫等官全無覺察殊負朕保愛良民之至意且竊賊雖非強劫然行竊日久必至夥劫所以律載竊盜

三犯即絞立法之意原在防微杜漸今各直省竊盜依律究擬者絕少盜案之多實由於此如何使有司不敢諱盜併如何重懲竊盜之處該部會同詳議具奏

雍正二年甲辰六月甲戌

上諭刑部向來盜案有滾案之弊強盜被獲審實定罪者於別府州縣或鄰省未結案內賄囑他盜供稱同夥州縣官即關提質審一案甫畢一案復起名曰滾案展轉相連動歷年歲或更中途脫逃遂使已結之案終歸未

結劫殺大盜借此支延無所畏懼而州縣轉喜此等供  
扳可為獲賊過半之地附會了事此弊不除無以鋤莠  
安良爾部定例議奏

十一月壬子

上諭大學士等廣西地方狃獍雜處匪類不時竊發踰山  
越嶺難以擒緝汛兵各守地界不敢擅自越境嗣後分  
防各弁不論何標何汛凡係附近處所毋分彼此互相  
應援庶匪類不得潛藏矣設兵原以衛民設有匪類自

當彼此策應協力擒緝著廣東廣西督撫提鎮公同酌議嚴飭各營汛一體遵行并傳諭直省督撫提鎮等凡地方有此等事當公同協力不可以疆界為限而分彼此也

雍正三年乙巳八月己卯

上諭吏部都察院安民必先弭盜盜風不息皆由有司官諱盜不報之故不但江南地方盜賊素多近聞河南湖廣路上有過往官員被劫者州縣官賄賂事主通同隱

匿司道既無覺察督撫亦受蒙蔽以致盜賊無忌貽害不小不可不嚴行稽察朕思巡按御史久經裁汰自不可復今或於滿漢御史竝部員內揀選賢能官酌量於湖廣江南浙江福建山東河南等省每省或差二員或一員或兩省差一員兼理令其專司稽察盜賊并巡查驛站烟墩僅有縱容盜賊隱諱不報者許據實題參一切地方事務差員不得干預若生事滋擾必從重治罪爾等詳細酌議具奏

雍正四年丙午二月壬申

上諭內閣安民必先弭盜而捕盜之法在於速拏聞有交界地方失事盜賊竄匿鄰境有司以地非管轄不便徑拘必用文移關提添差緝拏以致需遲時日間風遠颺即使日後拏獲而賊已花銷懸案不結凡係地方官均有弭盜之責何分此疆彼界嗣後交界地方失事探實賊盜藏匿之處無論隔縣隔府隔省一面即行密拏一面移文關會拏獲之後仍報明所在該管地方官添差



移解儻捕役借端誣害良民照例從重治罪各該有司  
務須協力稽查使姦宄無可潛藏以副朕息盜安民之  
至意

四月甲申

上諭大學士等弭盜之法莫良於保甲朕自御極以來屢  
頒諭旨必期實力奉行乃地方官憚其繁難視為故套  
奉行不實稽查不嚴又有藉稱村落畸零難編排甲至  
各邊省更藉稱土苗雜處不便比照內地者此甚不然

村落雖小即數家亦可編為一甲熟苗熟獐即可編入  
齊民苟有實心自有實效嗣後督撫及州縣以上各官  
不實力奉行者作何嚴加處分保正甲長及同甲之人  
能據實舉首者作何獎賞隱匿者作何分別治罪其各  
省通行文到半年以內被舉盜犯可否照家長自首之  
例暫治以輕罪舉首之盜儻有從前未經發覺之案地  
方官可否從輕處分以免瞻徇畏縮著九卿詳議具奏  
再盜案踈防文武各有處分雖著有成例但其中尚有

分別凡山海大盜聚衆多人土獍苗蠻成群劫奪及響  
馬老瓜等賊聚有窩穴勢難擒捕者當責之弁兵如久  
無緝獲則文武一例處分情罪俱當若盜止十人以下  
踪跡散處者則捕役力能擒制雖事發潛逃亦能躡探  
而營汛弁兵各有職守勢難遠緝此等盜犯似當專責  
州縣武職處分可否酌量從輕庶情法得平中無枉抑  
著九卿一併確議具奏

十一月癸卯

上諭大學士等朕覽九卿所議欲停夥盜減等發遣一案當日將夥盜分別減等乃

皇考聖祖仁皇帝好生至德從古未有之仁政也若照律不分首從皆斬立決則受戮者甚多其中不無應酌量矜減之人是以夥盜減等立法誠為盡善朕惟照舊遵行但行之既久地方官吏捕役人等悉知此例或將惡劣無能之輩嚴刑逼迫令其認為首之人反將姦狡積盜入於夥盜之中得邀減等亦未可定凡盜案

內必有實在為盜者亦有被人誘脅並非素常為盜情  
尚可憫者若將實在強盜拏獲即行正法不但法無不  
當且盜案亦不至於併積當日

聖祖仁皇帝未將夥盜減等之條著為定例原有深意但  
既施法外之仁通行年久朕意將此條另立檔案首載  
聖祖仁皇帝諭旨次將凡因盜案所下諭旨存案遵行嗣  
後遇有盜案務令地方各官詳察情形確實究審將案  
內之悍惡兇暴實在為盜及被人誘脅或出於一時救

死之計竝非素常為盜者一一分註明白於疏內聲明著大學士會同三法司將造意為首與極惡難留者仍按律擬斬其被人誘脅或非素常為盜情尚可憫有應行減等發遣者將應減等緣由於本內聲明具題至發遣之地亦不必定於黑龍江寧古塔等處應如何分發各省內地之處爾等公同詳細定議具奏

雍正五年丁未二月丙寅刑部議嗣後直省盜案務將法所難宥及情有可原者一一分晰於疏內

聲明大學士會同三法司仍照從前將應正法應減等發遣者分別詳議請

旨

上諭曰緝盜乃安民之要務兇暴不剪則善良不獲寧居故立法不容寬貸祇因同夥多人其中原有被人誘脅而非秉性姦回屢行劫奪者朕仰體

聖祖仁皇帝好生之仁施恩法外必須各省督撫大吏實心奉行分晰至當使積賊大盜不至漏網方為用法之

平儻姑息養姦意謂多寬一人即可造福是乃縱盜殃民其造作罪孽更甚於嚴厲苛刻者嗣後督撫所議減等之盜犯儻至發遣之處怙惡不悛一經發覺定將原議之督撫從重議處

九月癸亥

上諭大學士等弭盜安民乃為治之首務但緝盜之例最難於斟酌盡善如立法稍嚴似可防盜犯漏網之虞杜地方官諱匿不報之患然上司督責州縣州縣督責捕



役按期處分勒限責比過於迫切人多顧惜考成巧圖  
脫卸勢必有誣陷寃濫之事如立法稍寬似可詳籌緝  
捕免累無辜然又恐州縣視同膜外漫不經心捕役玩  
法養姦盜風愈熾此緝盜設法之難也至於失事之家  
往往亦有張大其詞者或以少為多或以竊為強甚至  
扳害平人洩其私憤挾制官長任意肆行此又報盜之  
弊也以上種種情形朕皆知之甚悉今覽田文鏡奏摺  
豫省地方有全無影響而捏報被盜者有別因事故而

託稱盜案者有以竊為強欲快其挾制之私者有以口

角微嫌遂報被盜欲逞其刁誣之計者既有如此惡習

法當嚴加禁止但思若嚴捏報被盜之處分刁詐者固

知斂跡恐謹良者必至不敢報盜矣朕實難之夫弭盜

之法貴乎至公至平寬嚴輕重之間皆須斟酌得宜俾

盜犯不能漏網平民不致拖累官吏皆盡緝盜之責而

不敢任意以失實事主得伸被盜之苦而不敢借端以

滋擾如此匪類方知儆懼而良民悉得寧居爾等可會

同九卿科道及部曹內曾經外任年久者悉心酌議務期妥協併將田文鏡摺奏詳議具奏

十一月癸酉

上諭兵部昔年

聖祖仁皇帝頒諭朝鮮國王倘有盜賊前往伊國劫掠著該國王即行追拏殺戮生擒解送自朕即位以來又降諭旨若飄風船隻人內有無票妄行生事者該國王即照伊國律例懲戒治罪屢次諭旨甚明今內地盜竊之

輩因各處捕緝禁約甚嚴無處可以藏匿是以潛逃外國苟且偷生該國王既列藩封當為朝廷盡捕盜安民之職乃柔懦不能遵奉轉使內地犯法之人恃朝鮮以為潛踪避罪之地此風斷不可長嗣後儻有匪類越境生事而朝鮮不能擒獲以致漏網者著該國王將伊國防汛之員題叅治罪該部將該國王一併議處以為藩王不能遵旨奉行捕盜安民者之戒著將此文與朝鮮國王知之

十二月壬辰內閣等衙門議覆河南總督田文鏡  
條奏弭盜各款

上諭曰盜案逾限不完即行叅處原為官役弛縱而設若  
因限期迫促致有誣拏平民栽贓買贓教唆口供扳累  
無辜諸弊甚非清理盜案之道嗣後果有虛實情形未  
分盜贓未確限內不能完結承審官應如何詳報上司  
應如何報部展限之處著另議儻有將易結之盜案不  
行速結濫請展限該督撫漫為咨部經部駁查者應將

該督撫及該有司如何處分之處亦著詳議又議稱凡

報盜案責令州縣正印官會同營汛星往事主家查勘情形所以防事主狡飾之端也夫事主之强悍者或以竊報強柔懦者或以強改竊固有狡飾之情至於地方文武官員因畏疎防承緝處分恐嚇事主抑勒改供亦未可定如有此等不肖官吏應作何處分之處亦著詳議又議稱初報盜劫正印官公出應令佐貳捕官會同營汛速驗但佐貳捕官未可深信如遇失事而正印官

公出佐貳捕官一面會同汎弁查驗先行緝捕一面申請鄰邑印官至事主家覆加查驗尤為詳慎應如何定例之處俱著詳議具奏

雍正六年戊申七月辛未

上諭刑部為治莫要於安民安民莫急於弭盜朕夙夜孜孜勤求治理無時不以安輯萬姓為念豈忍沽寬大之虛名姑息養姦以貽害吾善良之赤子乎邇者各省文武大吏亦知仰體朕懷嚴緝盜賊之踪跡窮治盜賊之

根株如浙江江南數十年之大盜積賊悉行拏獲而究問從前則供出劫財害命之案不可勝數似此狡獪渠魁尚不能逃於法則凡為盜賊之人其可不知悔懼乎朕念為盜賊者前此之愚頑皆自陷於死而不知而今此之窮蹙又將求其生而不得輾轉思維深為不忍因是特頒訓諭指示迷途而望其自新悛改凡為盜賊者皆吾民也乃不肯為國家愛養之良民而甘為國家誅殛之匪類豈非自作之孽更復何所歸咎乎而為盜賊



者每藉口於饑寒所迫計出無聊夫慮饑寒者謀生之心也而為盜賊者取死之道也以求生之心而趨必死之路雖在下愚不應出此凡能為盜賊之人必非老弱殘廢之輩有可用之膂力有可用之心思若務農耕種負販傭工即可為餬口之計或入營食糧當差効力且可為上進之階宇宙間謀生之人百千萬億而謀生之策亦甚多端奈何作此喪心昧理違條犯法之事乎蓋由此輩或游手好閒或賭博縱飲或好勇鬪狠一旦困

之窮苦利欲薰心遂生殺害劫奪之念以為昏夜之間  
無人識認未必即被拘執而受刑戮也不知一案敗露  
則衆案皆難掩藏一人被擒則夥黨皆難隱匿往事具  
在豈不聞之盜賊若肯為善良必不致於饑寒而死以  
視身首異處肆於市曹桎梏囹圄傷殘肢體父母妻子  
遷徙流離果何得而何失孰危而孰安乎朕心惡此輩  
之肆行不法又深憫此輩之愚昧無知示以自新之路  
特施法外之仁許其自首免罪凡各省盜賊未經緝獲

到官者其中為首造意及傷害人命之犯若自行陳首  
朕酌其情稍可原者量從寬減若被人引誘迫脅跟隨  
為盜之犯自行出首則將伊應得之罪予以寬宥俾得  
改除舊惡永為良民受國家惠養之澤若此旨既到之  
後而為盜賊者不行自首其有已經自首免罪之後而  
復為盜賊者定行加重治罪儻有不肖官員因盜案不  
結有碍考成賄買無賴之人冒認為盜自行出首以圖  
銷案者一經察出將賄買之官及代認之人俱即正法

不貸著在京在外地方大吏通行所屬俾遠鄉僻壤之民咸共知之

九月乙亥川陝總督岳鍾琪奏永壽縣拏獲竊賊党奇等忽被卦子數十人拒捕脫逃

上諭刑部聞卦子匪類隸籍於江南之廬鳳及河南山東直隸山陝地方其男婦皆習拳棒技藝攜帶馬騾遨遊各省每過人煙稠密之地則以技藝博取錢米及至孤邨獨舍行旅單身則恣意搶奪與盜賊無異如陝西永

壽縣一案公然持械拒捕搶奪賊犯其肆行不法可知  
又聞漢中府盤獲挈家遊蕩之男女數十口現在審訊  
嗣後著各該地方官悉心稽查儻有此等匪類潛匿境  
內即著查出押解回籍收入保甲如在外別有夥盜不  
法事情仍按律治罪儻容留之地方不行查出或已經  
解回之後縱令再出者將該管官嚴加處分

十一月丙辰刑部議准原任江西巡撫布蘭泰奏  
信豐縣民殷志素家僕殷來福仔夥同邱文遠等

偷竊伊主財物殷來福仔應依奴婢盜家長財物  
減凡盜一等例免刺僉流

上諭曰查律內監守自盜併贓論罪是較平常竊盜擬罪  
較重今奴婢盜家長財物與監守自盜官物者情罪相  
等豈盜官物者應從重而盜家長財物者便可從輕乎  
况殷來福仔起意勾引外人同盜伊主財物情罪尤屬  
可惡部議引減等之律定擬尤屬未協嗣後奴婢盜家  
長財物應如何定例之處該部詳議具奏

雍正七年己酉六月癸巳

上諭刑部前因直隸盜案往往多於他省是以降旨令將直隸盜案仍照舊例不分首從皆斬後因定例伊始鄉僻愚民未必人人盡知若一概置之重辟於心實為不忍是以將直隸盜案亦暫照各省盜案分別斬決發遣二項歸結原冀愚頑之輩感恩畏法遷善改惡共為良善之民也乃年來直隸盜案雖似畧減而仍復不少且有所得贓物甚微非積盜行劫數次之人而甘心罹於

重法者朕推原其故必係地方有司未將從前首從皆斬之諭旨愷切詳明通行曉諭是以伊等罔知儆懼復蹈前轍用是再頒此旨著直隸總督徧行宣諭自庚戌年為始直隸境內再有為盜劫之事者定照首從皆斬之舊例行如地方官仍疎忽從事不明白徧行曉諭將來事發一併嚴加治罪

雍正八年庚戌八月癸卯

上諭兵部廣東地方山海交錯民彘雜處賊盜易於潛踪



所恃以防範者則有安設之塘汎星羅碁布絡繹聲援  
無事則相為守望一遇盜賊則協力擒拏勿使遁逸其  
水汎與陸汎不相比附者則應各自管轄巡防若陸汎  
設於江邊雖無舟楫亦當與水汎為犄角之勢此設立  
防汎之本意也朕聞廣東防汎兵弁甚屬廢弛今年四  
月間三水縣太監沙汎有行舟被盜劫物殺人竝無汎  
兵救護及賊衆去後亦不追拏其失事之處則緊貼汎  
地似此怠玩成風視同秦越則設立汎兵有何裨益彼

河南浙江之防汎整齊嚴肅衆人皆知豈廣東之文武大臣獨不知之乎著該提鎮嚴行稽查整飭儻再有似此推諉怠忽者即將該管弁員題參兵丁從重治罪若該提鎮有心徇隱或失於覺察經朕訪聞定行嚴加議處

雍正十一年癸丑四月乙丑

上諭刑部向來直隸盜案徃往多於他省朕以畿輔重地理宜倍加清肅乃宵小肆行如此不得不嚴加懲創以

示儆戒是以預先屢次曉諭然後定例於雍正八年為始將盜夥不分首從皆行正法此朕辟以止辟不得已之苦心也近年以來直隸盜案較前減少是小人頗知畏法朕仍可遵奉

皇考法外施仁之意從寬辦理矣著將直隸盜案仿照各省分別法無可貸情有可原定擬具奏儻姦民玩法日後盜案復多朕必仍照不分首從皆斬之例行若各省盜案有加多於平日者亦照不分首從之例行著各該

督撫地方有司通行曉諭務使遠鄉僻壤之民共知之

大清世宗敬天昌運建中表正文武英明寬仁信毅大孝  
至誠憲皇帝聖訓卷三十六